


Nā Wai Ēnei Kai?

nā Paora Tibble

Amokura

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.



He whakarāpopoto

Pānuitia te whakarāpopoto ki te ākonga. He wā kai tēnei. Ko tēhea te kai mā tēnā, mā tēnā?

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia te ingoa o te pukapuka. Matapakia me te ākonga ngā ture mō te whakatūpatō i roto i te kāuta i te kāinga, i te kōhanga reo, me te kura.

Pātai atu ki te ākonga me pēwhea te kōhua hēki, raihi, me te kihu parāoa.

I runga tonu i te tauira pātai ōrite ki te ingoa o te pukapuka, pātaihia tērā e whai ake: Nā wai ēnei pukapuka, pēke, pounamu rānei?

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tātari, whakahau tika;
- titiro mēnā e tika ana, e pai ana hoki (mā te tataui i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei:
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapai hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini kōpae puoro, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te kaupapa o tēnei pukapuka?
2. He aha ngā momo kai?
3. He pēwhea te kānga pirau ki te ihu?
4. Kei te kai ngā tamariki i hea?
5. He pai ki a koe te kānga pirau? He aha ai? He aha i kore ai rānei?

Ngā whakautu ki ngā whakapuaki māramatanga

1. Ko tēnei te wā kai mō ngā tamariki kei te kōhanga reo.
2. He hanawiti, he kānga pirau, he kihu parāoa, he hēki, he panana, he kai hainamana.
3. He haunga ki te ihu.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

T Te ui me te whakautu i te pātai.

He whakatakinga ā-roro, he whakaharatau

I mua i te pānui pukapuka, matapakia ngā momo kai e reka ana ki te ākonga. Tapahia pikitia mai i ngā puka moheni, ā, whakaingotia ngā momo kai i tiwhiri ai te ākonga.

Takatū me te ākonga ki te mahi kānga pirau.

Kia oti i te ākonga te pukapuka, matapakia ngā kai pai me ngā kai kore pai ki te ākonga.